

駢體文鈔

冊八

新編 文苑

駢體文鈔卷二十四

墓碑類

蔡伯喈胡公碑銘

○中郎文每有窮語拙語而質樸以立體故不為累後人不可藉口

凡用韻處古意可法

表墓之文中郎為正宗凡可為規範者皆在所錄不善學之千篇一律

公諱廣字伯始南郡華容人也其先自媯姓建國南土曰胡子春秋

書焉列于諸侯公其後也考以德行純懿官至交趾都尉公寬裕仁

愛覆載博大研道知幾窮理盡性凡聖哲之遺教文武之未墜罔有

不綜年二十七察孝廉除郎中尚書侍郎左丞尚書僕射內正機衡

允釐其職文敏暢乎庶事密靜周乎樞機帝用嘉之遷濟陰太守公

乃布愷悌宣柔嘉通神化導靈和揚惠風以養真激清流以盪邪取

忠肅於不言消奸宄於爪牙是以君子勤禮小人知恥鞠推恩於官

曹刑戮廢於朝市餘貨委於路衢餘種棲于畝畝遷汝南太守增修

前業考績既明入作司農實掌金穀之淵藪和均關石王府以充遂

作司徒昭敷五教進作太尉宣暢渾元人倫輯睦日月重光遭國不

造帝祚無主援立孝桓以紹宗緒用首謀定策封安樂鄉侯戶邑之數加于羣公入錄機事聽納總己致位就第復拜司空敷土導川俾順其性功遂身退告疾固辭乃爲特進爰以休息又拜太常典司三禮敬恭禋祀神明嘉歆永世豐年聿懷多福復拜太尉尋申前業又以特進逍遙致位又拜太常遺疾不夷遜位歸爵遷於舊都徵拜太中大夫延熹末年聖主革正幸臣誅斃引公爲尙書令以二千石居官委以閫外之事釐改度量以新國家宏綱旣整袞闕以補乃拜太僕車正馬閑六騶習馴遷太常司徒威宗晏駕推建聖嗣復封故邑與參機密寢疾告退復拜太傅錄尙書事于時春秋高矣繼親在堂朝夕定省不違子道旁無几杖言不稱老居喪致哀率禮不越其接下答賓雖幼賤降等禮從謙尊尊而彌恭勞思萬機身勤心苦雖老萊子嬰兒其服方叔克壯其猷公旦納于台屋正考父俯而循牆曷以尙茲夫烝烝至孝德本也體和履忠行極也傳聞周覽上通也勤

勞王家茂功也用能七登三事篤受介祉亮皇業於六王嘉丕績於九有窮生人之光寵享黃耆之遐紀蹈明德以保身與福祿乎終始年八十有二建寧五年春壬戌薨于位天子悼痛贈策賜誄諡曰文恭如前傳之儀而有加焉禮也故吏司徒許相等相與欽慕崧高蒸民之作取言時計功之則論集行跡銘諸琬琰其詞曰伊漢元輔時惟文恭聰明睿哲思心不容畢力天機帝休其庸賦政于外有邈其蹤進作卿士粵登上公百揆時序五典克從萬邦黎獻共唯時雍勳烈既建爵土乃封七被三事再作特進宏唯幼冲作傅以訓赫赫猗公邦家之鎮澤被華夏遺愛不淪日與月與齊光並運存榮亡顯沒而不泯

蔡伯喈太傅文恭侯胡公碑

公諱廣字伯始交趾都尉之元子也公應天淑靈履性貞固九德咸修百行必備遭家不造童而夙孤上奉繼親下慈弱弟崎嶇儉約之

中以盡孝友之道及至入學從訓歷觀古今生而知之聞一覩十兼以周覽六經博總羣議旁貫憲法通識國典年二十七察孝廉除郎中尚書侍郎尚書左丞尚書僕射幹練機事綢繆樞極忠亮唯允簡于帝心智略周密冠于庶事遷濟陰太守其爲政也寬裕足以容衆和柔足以安物剛毅足以威暴體仁足以勸俗故禁不用刑勸不用賞其下望之如日月從之如影響思不可忘度不可革遺愛結於人心超無窮而垂則徵拜大司農遂作司徒遷太尉以援立之功封安樂鄉侯錄尚書事稱疾屢辭策賜就第復拜司空功成身退俾位特進又拜太尉復以特進致命休神又拜太尉遜位歸爵旋于舊土徵拜太中大夫尚書令太僕太常司徒永康之初以定策元功復拜前邑錄尚書事疾病就第又授太傅八參機衡五蹈九列七統三事諒闇之際三據冢宰和神人於宗伯理水土於下台訓五品於司徒耀三辰于上階光弼六世歷載二十自漢興以來鼎臣元輔耆耄老成

勳被萬方。與祿終始。未有若公者焉。春秋八十二。建寧五年三月壬戌薨于位。天子悼惜。羣后傷懷。詔五官中郎將任崇奉冊。贈以太傅安樂鄉侯印綬。拜室家子一人。郎中賜東園祕器。賜絲帛含斂之備。中謁者董詡弔祠護喪。錢布賻賜。率禮有加。賜諡曰文恭。昭顯行迹。四月丁酉葬于洛陽塋。故吏濟陰池喜感公之義。率慕黃鳥之哀。推尋雅意。彷徨舊土。休績不烈。宜宣于此。乃樹石作頌。用揚德音。詞曰。於皇上德。懿鑠孔純。大孝昭備。思順履信。膺期命世。保茲舊門。淵泉休茂。彪炳其文。爰贊天機。翼翼唯恭。夙夜出納。紹跡虞龍。賦政于外。神化元通。普被汝南。越用熙雍。帝曰休哉。命公三事。乃耀柔嘉。式是百司。股肱元首。庶績咸治。二氣燮雍。五徵來備。勳格皇天。澤洽后土。封建南藩。受茲介祐。玉藻在冕。毳服艾輔。輅車雕驂。四牡修扈。贊事上帝。祇祀宗祖。陟降盈虧。與時消息。旣明且哲。保身遺則。同軌日昃。光充區域。生榮死哀。流統罔極。

蔡伯喈太傅胡公碑

合以上三篇觀其部勒變動之法

珍做宋版印

維漢二十有一世建寧五年春三月既生魄八日壬戌太傅安樂鄉侯胡公薨越若來四月辛酉葬我君文恭侯於是掾太原王允鴈門卑整屬扶風曾宙潁川敦歷等僉謂公之德也柔而不犯威而不猛文而不華實而不樸靜而不滯動而不躁總天地之中和覽生民之上操聰明膚敏兼質先覺涉觀憲法契闊文學睹臯陶之闡闡探孔子之房奧然而約之以禮守之以恭寬之以納衆汎愛多容其誘人也恂恂焉怡怡焉能使蒙惑開析僞戾優順逸惰勤信及其創基發跡機密聖朝其知其能夙夜惟寅以允帝命是以頻繁機極三升而不出焉乃還譚其舊章彌綸古訓貫萬品研精微用補前臣之所闕十年而無愆強記同乎富平周慎逸於博士偶山甫乎喉舌匹虞龍而納言唯帝命公以二郡其爲政也導人以德帥物以己敦以忠肅勵以知取人悅其化天樂其和士相勉於公朝民勸行於私家徽纏

縈而靡係鞭撲棄而無加洋洋乎若德宣治嚴以爲威寬以爲福而已哉五作卿士七蹈相位太僕司農太傅司空各一司徒特進各二太常太尉各三光輔六世歷載三十有餘其致治也通水泉於潤下蕃后土於稼穡訓五品於羣黎參人物於區域耀三辰於渾元協太中於皇極傳舊德於幼冲率日顛於舊職譬彼四時功成則退在盈思冲升降以順建封域於南土踐殊號於特進榮祚統業垂乎來允公自二郡及登相位凡所辟用遂至大位者故司徒中山祝恬其餘登臺閣據賦政策勳樹功流化者蓋不可勝載惟我末臣頑蔽無聞仰慕羣賢惡乎可及自公寢疾至於薨斃參與嘗禱列在喪位雖庶物戮力不愆于禮進睹墳塋几筵空設退顧堂廡音儀永闕感悼傷懷心肝若割相與累次德行撰舉功勳刊之于碑用慰哀思其詞曰煥文德伊胡后應期運作漢輔嘉中興膏民庶澤洪淳亶攸序巨地區充天宇麟高逵踵遐武揚景烈垂不朽仰邃古耀昆後雖諛贊亦必肖似其

人雖復鍾亦能變化其體合三篇而觀之可考見後人章句所師法

蔡伯喈楊公碑

○危世立抗節之大臣直書其事亦生氣遠出

公諱秉字叔節宏農華陰人其先蓋周武王之穆晉唐叔之後也未
葉以支子食邑于楊因氏焉周室既微裔胄無緒暨漢興烈祖楊喜
佐命征伐封赤泉侯嗣子業紱冕相繼公之丕考以忠蹇亮弼輔孝
安登司徒太尉公承夙緒世篤儒教以歐陽尚書京氏易誨授四方
學者自遠而至蓋踰三千初辟司空舉高第拜侍御史遷豫州兗州
刺史任城相徵入勸講拜太中大夫左中郎將尚書出補右扶風留
拜光祿大夫遭權嬖貴盛六年守靜外戚火燔爾乃遷太僕太卿公
事絀位浹辰之間俾位河南憤疾豪強見邁姦黨用嬰胥靡起家復
拜太常遂陟三司沙汰虛冗料簡貞實抽援表達與之同蘭芳任鼎
重從駕南巡爲朝碩德然知權過於寵私富侔國大臣苛察望變復
還條表以聞啓導上怒其時所免州牧郡守五十餘人饜戾是黜英

才是列善否有章京夏清肅在位七載年七十有四延熹八年五月丙戌薨朝廷惜焉寵賜有加公自奉嚴勅動遵禮度量材授任當官而行不爲義絀疾是苛政益固其守厨無宿肉器不鏤雕夙喪嬪儷妾不嬖御可謂立身無過之地正直清儉該備者矣昔仲尼嘗垂三戒而公克焉故能匡朝盡直獻可去奸忠侔前後聲塞宇宙非黃中純白窮達一致其惡能立功立事敷聞于下昭升于上若茲巍巍者乎於是門人學徒相與刊石樹碑表勒鴻勳讚懿德傳億年於戲公唯嶽靈天挺德翼赤精神細縕仁哲生應台階作邦楨帝欽亮訪典刑道不忒迄有成光遐邇穆其清

蔡伯喈司空文烈侯楊公碑

摹尚書語後人疵之
篇稍弱

三楊碑文烈

曰漢有國師司空文烈侯楊公公唯司徒之孫太尉公之允子皇祖考以懿德胥及肆勤式建不休勳啓洪範公祇服宏業克丕堂構小乃不敢不慎大亦不敢不戒用罔有擇言失行在于其躬洎在辟舉

先志載言罔不攸該乃自宰臣以從王事立功不有用辭其祿逮作御史允執國憲納于侍中在帝左右爰董武事王師孔閑羣公以舊德碩儒道通術明宜建師保延入華光侍宴露寢敷典誥之精旨達聖王之聰睿帝以機密齊栗常伯劇任鮮克知臧以釐其采命公再作少府俾率其屬以熙庶績天地作險國家丕承軍門祛禁式遏寇虐命公再作光祿亦總其熊羆之士不貳心之臣保乂帝家巖巖大理惟制民命命公作廷尉惟刑之恤旁施四方惟明折獄蔽罪于憲之中亦惟三禮六樂國之元幹命公作太常明德惟馨八音克諧神人以和永世豐年溥天率土而衆莫外命公作司空公唯戢之翊明其政時惟休哉惟天陰隲下民彝倫所由順序命公作司徒而敬敷五教以親百姓父義母慈兄友弟恭子孝時惟休哉昭孝于辟雍命公作三老帝躬以祇敬遵有虞于上庠茫茫大運垂光烈曜命公作太尉璇璣運周七精循軌時惟休哉帝欲宣力于四方公則翼之辟

道或回公則弼之虔恭夙夜不敢荒寧用對揚天子不顯休命天子
大簡其勳用授爵賜封侯于臨晉功成化洽景命有傾帝乃震慟執
書以泣命于左中郎將郭儀作策賜公驃騎將軍臨晉侯印綬兼號
特進諡以文烈寵命畢備而後卽世肆其孤彪敢儀古式昭銘景烈
銘曰

天鑒有漢誕生元輔世作三事勳在王府乃及伊公克光前矩悉心
畢力允其祖武化洽羣心澤霑區宇帝曰文烈朕嘉君功爲邑河渭
建茲土封申備九錫以祚其庸位此特進於異羣公昔在申呂匡佐
周宣崧高作頌大雅揚言今我文烈帝載用熙參光日月比功四時
身歿名存永世慕思

蔡伯喈漢太尉楊公碑○

氣象淵靜本于經術

公諱賜字伯猷宏農華陰人姬姓之國有楊侯者公其後也其在漢
室赤泉侯佐高丞相翼宣咸以盛德光于前朝祖司徒考太尉繼蹟

宰司咸有勳烈公承家崇軌受天醇素欽承奉構閑于伐柯烈風維
變不易其趣文藝典籍尋道入奧操清行朗潛晦幽閑不答州郡之
命辟大將軍府不得已而應之遷陳倉令公乃因是行退居廬公車
特徵以病辭司空舉高第拜侍中越騎校尉帝篤先業將問故訓公
以羣公之舉進授尚書于禁中遷少府光祿勳敬揆百事莫不時序
庶尹知恤閭闔推清列作司空地平天成陰陽不忒公遂身避託疾
告退又以光祿大夫受命司徒敬敷五品宣洽人倫燮和化理股肱
耳目之任靡不克明及至太尉四時順動三光耀潤羣生豐遂太和
交薄二作六卿五蹈二階受爵開國應位特進非盛德休功假于天
人孰能該備寵榮兼包令錫如公之至者乎公體資明哲長於知見
凡所辟選升諸帝朝者莫非瑰才逸秀并參諸佐惟我下流二二三小
臣穢損清風愧于前人乃糾合同寮各述所審紀公勳績刊石立銘
以慰永懷銘曰

天降純嘏篤生柔嘉俾允祖考光輔國家三業在服帝載用和粵暨
我公尤執忠貞在棟伊隆于鼎斯寧德被宇宙華夏以清受茲介福
履祚孔成爲邑河渭袞冕絳珽以佐天子祇事三靈不顯伊德萬邦
作程爰銘爰贊式昭懿聲

蔡伯喈朱公叔墳前石碑

○ ○ 公叔名人碑文簡質不溢後人不能

維漢二十一世延熹六年粵四月丁巳忠文公益州刺史朱君名穆
字公叔卒于京師其五月丙申葬于宛邑北萬歲亭之陽舊兆域之
南其孤野受顧命曰古者不崇墳不封墓祭服雖三年無不於寢今
則易之吾不取也爾其無拘于俗無廢予誠野欽率遺意不敢有違
封墳三板不起棟宇乃作祠堂于邑中南陽舊里備器鑄鼎銘功載
德懼墳封彌久夷于平壤於是依德像緣雅則設茲方石鎮表靈域
用慰其孤罔極之懷乃申詞曰

敬惟忠文時惟朱父實天生德不承洪緒彌綸典術允迪聖矩好是

貞厲疾彼強禦斷剛若仇柔亦不茹仍用明夷邁愍受侮帝曰休哉
朕嘉乃功命汝納言允汝祖蹤父拜稽首翼翼惟恭篤斐不忘夙夜
在公昊天不弔降茲殘殃不遺一父俾屏我皇我皇悼心錫詔孔傷
位以益州贈之服章用刊彝器宣昭遺光子子孫孫永載寶藏

蔡伯喈陳太邱碑○○

文有道氣漸近自然推崇至極猶若不盡少
時誦習頗有違言亦兒童之見也

先生諱寔字仲弓潁川許昌人也含元精之和應期運之數兼資九
德總修百行於鄉黨則恂恂焉斌斌焉善誘善導仁而愛人使夫少
長咸安懷之其爲道也用行舍藏進退可度不徼訐以干時不遷貳
以臨下四爲郡功曹五辟豫州六辟三府再辟大將軍宰聞喜半歲
太邱一年德務中庸教敦不肅政以禮成化行有謚會遭黨事禁錮
二十年樂天知命澹然自逸交不詔上愛不黷下見幾而作不俟終
日及文書赦宥時年已七十遂隱邱山懸車告老四門備禮閑心靜
居大將軍何公司徒袁公前後招辟使人曉諭云欲特表便可入踐

常伯超補三事紆佩金紫光國垂勳先生曰絕望已久飾巾待期而已皆遂不至宏農楊公東海陳公每在袞職羣僚賀之皆塞首曰賴川陳君命世絕倫大位未躋慚于文仲竊位之負故時人高其德重于公相之位也年八十有三中平三年八月丙子遭疾而終臨沒顧命留葬所卒時服素棺槨財周櫬喪事唯約用過乎儉羣公百僚莫不咨嗟巖藪知名失聲揮涕大將軍弔祠錫以嘉謚曰徵士陳君稟嶽瀆之精苞靈曜之純天不憖遺一老俾屏我王梁崩哲萎于時靡憲縉紳儒林論德謀績謚曰文範先生傳曰郁郁乎文哉書曰洪範九疇彝倫攸敘文爲德表範爲士則存誨沒號不亦宜乎三公遣令史祭以中牢刺史敬弔太守南陽曹府君命官作誄曰赫矣陳君命世是生含光醇德爲士作程資始旣正守終有令奉禮終沒休矣清聲遣官屬掾吏前後赴會刊石作銘府丞與比縣會葬荀慈明韓元長等五百餘人總麻設位哀以送之遠近會葬千人以上河南尹种